

GISIKCHI TANGANI

Sabbath Attam-September 9

Ia Antini Lessona Poraiani: *Gal. 5:16–25; Deut. 13:4, 5; Rom. 7:14–24; Jer. 7:9; Hos. 4:2; Mati 22:35–40.*

Mingani Pod: “Indiba anga agana, Gisiko re-rurabo, unode na-simang be-enni skako chu-sokatjawa” (*Galatirangna 5:16*).

Kristianrangni ring-na namnikbatsranggiparangoni mingsa gitara Robert Robinsonni git “Ma-manti Patigipako” ingipa ong-a. Robinsonara bebera-anio bilakgipa mandede ong-jachim. Uni pagipani siani uko ka-onanganio galangaha, aro ua agre cha-a ringa dakao ga-akaha. Indiba mingsinggipa skipravgipa George Whitefieldko knaani ja-mano, Robinson an-tangni janggiko Gitelna on-aha, Methodist mondolini pastor ong-aha, aro ua gitko seaha. Uni original seade ia ritingrangba dongachim:

“Salni salan Un ka-saako,
Man-e grosa dakengjok;
Angko ka-sae jokatpabo,
Janggi gisik Nang-ninjok.

Uni gito seaniara Kristian ka-tongrangni re-brangengani gimin ong-achim. Saoba ua kattarango dongtojaenba, uko indake dingtangataha:

“Olakkina Gitel, anga namnikbegen,
Ka-sana Gitel, jenan anga kam ka-a.”

Gitko segipani seani gita, original kattarangara Kristianni dakgrikaniko tikan talata. An·ching bebera·giparango ia minggnian gnang, be·enni aro Gisikni skani, aro uaranga pangnan nanggrikamaia. An·chingni papni bewalrangara pangnan Isoloni re·brangna am·giparang ong·oba, Uni Gisikna an·chingara on·kangna skengode, indide an·chingara be·enni skanirangna nokkol ong·jawa. Ian ia antina Paulni Nama Kattako an·chingo siknapatani ong·enga.

**Ia antini lessonko Sabbath sal September 16 na name poraie taribo.*

Robibar

September 10

GISIKO RE·RURAAANI

Galati 5:16 ko poraibo. “Re-ruraa” ia miksonganiara bebera·e janggi tanganio maiko miksonga? Deut. 13:4, 5; Rom. 13:13; Eph. 4:1, 17; Kol. 1:10.

“Re-ruraa” kattara Niam Gitchamniko ra·gipa toe aganani chin ong·a. Ian, mandeara maikai ong·na nanga uko mesokna jakkalgipa ong·a. Paul an·tangba Jihudi ong·a, uni chitirango ua Kristian janggi tanganio mandeara maidake tangna nangachim uko talatna ia toe aganani chinko jakkalrongaha. Uni ia toe aganani chinko jakkalanio skanggipa bimungo nangenaba donga; maina uan skangni mondolio nangbilbalaha. Jisuni sniggiparangna skang Kristianrang minga dongachim (*Wat. 11:26*), uamangkora “Rama”ko ja·rikgiparang inesan uitokachim (*Johan 14:6, Wat. 22:4, 24:14*). Indake chengonin Kristian ong·aniara Jisuo rikgipa toromo bebera·animangmansan ong·aija indiba janggi tangao maidake re·na nanga ugita re·ani giminba ong·a.

Paulni re-ruraani gimin toe agananiara Niam Gitchamo niktigipaoni maichi dingtanga? *Re-o. 16:4; Lev. 18:4; Jer. 44:23 ko Gal. 5:16, 25; Rom. 8:4 baksa tosusabo.*

Niam Gitchamo mandeni bewalko *re-ruraa* inesan talataijaha indiba “*niamo re-ruraa*” ine rongtalbate talata. *Halakhah*-ra Jihudirangni niam gita jakkalgipa katta ong-a, uko niam aro rabbirangni ma-gitcham-pagitchamrangni dakritingbaani niam-retirango nikna man-gipa niam-retirango nikna man-gipako mesokna jakkala. *Halakhahra* Jihudirangni niam aro pagitchamrangni dakrikrikbagipa niamrangna aganna jakkalgipa sorkarini ra-chakgimin katta (*legal term*) ong-a. *Halakhahko* “Jihudini Niam” ine pe-aha, ua katta ong-chongmotade Ibri katta “*re-ruraana*”o ja-pang ong-a aro uni ortoara “*maidake re-ruraenga*” uko mesokani bewal ong-a.

Paul *gisiko re-ruraaniara* niamna bamgija re-ani ong-ja ine agana. Kristianrangra niamko pe-e janggi tangna nanga inede ua miksongjaenga. Aroba Paulara niamko ra-chakgijagipaba ong-ja. Jeko ua ra-chakja uara niamko kingkot dakani giminsa ong-a, jeon niamko jakkalsretani ong-a. Isolni nangnikgipa asol bamaniko draachi ong-atna man-ja indiba mandeni ning-osa iade Gisikchi ong-baa (*Gal. 5:18*).

Nang-ni Gisiko re-ruraani” *experienceara* maikai ong-enga? Na-a uko maikai daka? Nang-ni janggi tanganio maidakgiparang indakgipa re-ruraanina namen man-dikaniko ong-ata?

Sombar

September 11

KRISTIAN DAKGRIKANI

“Maina be-enni ska Gisikni bobil, Gisikniba be-enni bobil ong-a; maina na-simangni skarangko na-simang

dakjana gita, ia minggni champenggrika” (*Gal. 5:17; Rom. 7:14–24 koba nibo*). **Na·ara maikai, bebera·gipa saksa ong·pae nang·ni janggi tanganiora, ua kattarangni ka·namgija dakaniko aro sa·dikanikora ra·aha?**

Ia Paulni dakgrikani gimin agangipara sakantini dakgrikani giminde aganjaenga; ian Kristian sakantio be·en aro gisik ning·o dakgrikani dongakosa miksonga. Maina mandeara be·enni skanirang baksasa atchibaa (*Rom. 8:7*), an·ching Gisikchi gital dake atchitaaosa gisikni chongmotgipa dakgrikanirangde nakatbaa (*Johan 3:6*). Ian Kristian ong·gijagiparangde gisikni dakgrikanirang dongja ine aganjaenga; uamangoba dongchongmota. Uaba Gisikni bitean ong·a. Kristianni dakgrikania, maibakai, apalbate ra·a, maina bebera·gipao minggni cholonrang donga, aro uaranga ge·sa ge·gipin baksa dakgrikamaia. Ura be·en aro Gisik ong·a.

Itihas jolgimikan, Kristianrang ia dakgrikaoni jokna ske dongengahachim. Indakenba mitamrang songo·nokoni ong·kate dongpilaha, aro mitamranga ia papni kamoni maiabadakgipa salgini ka·sachakaniko man·osa jokna man·gen ineba chanchipil·aha. Ia minggnian dilsretaha. Gisikni bilchi an·ching be·enni skarangko ra·rikna amgen, dakgrikanide Gnigipa Re·baanio an·ching gital bimangko man·kujaona kingking rokomarichi ong·angkugen. Songoni ong·kate dongge mamung namgniko man·jawa, maina jechi an·ching re·a, dakgrikani an·ching baksan re·chapaia, aro ian an·chingni siaonan ba Gnigipa Re·baanionan ong·angkugen.

Rom 7 o Paul Kristianrangni gisik ning·o dakgrikanini gimin seon ua dakgrikani bilakanini giminba ua gisik on·e seaha. Maina an·chingora dolgni ma·malrang donga, aro an·chingara ua dolgnion somoisanon ong·a. Gisikchini bakara an·chingko namarangko dakna skata, aro be·ennirangko mitchiata. Be·enni dolara, be·enni skanirangko dakna skata, aro

uan gisiknide bikpil ong-skaa. Maina gisik pilgipa mande, an-tangaride, be-enni skanirangko jechakna gisik namen bilgria, indake be-enni skarangko gelna an-chingo mingsa mangmang ka-donganide salantio Gisikni iarangko amna dilani gita re-na basee ra-aniosan ong-na man-a. Iani giminsa Paulara an-chingko Gisiko re-rurana besee ra-china jotking agana.

Ia dakgrikanio na-a an-tangni *experience* ong-ahao pangchake, saksa Kristianna jean ia dakgrikani gimin sing-ani pangnaba bon-gijagipana na-a mai ku-patianiko on-na man-gen?

Mongolbar

September 12

BE-ENNI KAMRANG

Gisik aro be-enni gisepo dakgrikanirangko talatani ja-mano Paul Galati 5:18-26 o mandeni namgijagipa kamrang aro namgipa gunrangni dingtangrikaniko namen dokbadale agananiko daka. Mandeni namgijagipa kam aro namgipa gunrangni bigapon (*catalog*)ara Jihudi aro Greek-Roman sea jotanirangoba namen see-jote mangrakatgimin ong-aha. Ia sulsul minge segiminrangko namgija bewalrangko gelna aro nama gunrangko ra-gatskana nanganiko mesokna dakaha.

Ka-mao namgija kam aro namgipa gunrangni gimin sulsul see on-aniko simsakbee nibo. Mairangchi Paulni Galati 5:19-24 rango sulsul on-gipa (*lists*) rangara ia dingtanggipa sulsul see on-ani (*lists*) rangmung apsananga? Jer. 7:9; Hos. 4:2; Mark 7:21, 22; 1 Tim. 3:2, 3; 1 Pit. 4:3; Para Pe-a. 21:8.

Namgija dakbewal aro namgipa gunni gimin seaniko Paul namen simsakbeoba, Galatirango uni minggni seaniko

jakkalanio namen niksenggipa dingtanggrikanirangba donga. Skanggipa, ia minggni seaniko Paul dingtanggrikatahaoba, ua uarangko apsan dake ra·jaha. Ua namgija dakbewalni seaniko “be·enni kamrang,” indiba namgipa gunni gimin seaniko “Gisikni bite” ine donaha. Ian namen nangchongmotgipa dingtanggrikani ong·a. James D. G. Dunnni seani gita, “Be·enara skanirangko *dabia*, indiba Gisikara nama kamrangko *ong·katata*. Mingsa, skanggipani cholonara antangtangni namnika/sikbeaniko agana, aro mingsagipara gipinrangni tomtomani, jripjrip ong·ani, ka·dongchakna man·ani gimin aganbata.”—*The Epistle to the Galatians*, p. 308.

Gnigipa Paulni minggniko searangni gisepo gisik nangatbegipa dingtanggrikanicara namgija dakbewalni cholonko *plural formo* che·em che·em bimung on·e seaha: “be·enni *kamrang*.” “Gisikni bite,” maibakaiba, singular ong·a. Ia dingtanggrikaniko aganna man·gen je be·eno janggi tangania ma·mal ekani, dakgrikjijaani, aro nangrim·meligrikgijanirangkosa didia. Iani bikpile, Gisikni songnoko janggi tanggiparanga Gisikni bite rongsakosan ong·katata, jean mingsku gunrangko rongsano nangrime ong·katata.

Ia obostao mitam manderang indake agana: mande maiko Isolo bebera·aha, jena kingking ua kakket aro sontol ong·kuja, uan mamungniba ong·kuja. Paulni, namgija kamni seanirangara indake aganskaa: Isolni gimin namgija chanchiani aro nikanirang, til·ek·an·che janggi tangani, torom aro cholonrangni gimin ong·gija chanchiaona dilaha, aro indaken nokdang aro mandeni nangrim·meligrikanirangko be·grauataha. Iana agreba, uarangara jringjrotni janggiko gimaatanionaba dila (*Gal. 5:21*).

“Be·enni kamrang”ni gimin sulsul seanirang gita niatbo. Mairangchi na·ara mingprakan Ge·eta Mingchikkingoni mingsako ba una bateba niam pe·ani ong·a ine nikna man·a?

GISIKNI BITE (*Gal. 5:22–24*)

“Indiba Gisikni bite iarang, ka·sara, katchaa, tomtoma, chakchika, rinok rinok daka, nama, bebera·a, sontol daka, antangtangko bamata; indongarangko beng·na niam dongja” (*Gal. 5:22, 23*). Ia podrango agana gita, mairangchi Ge·eta Mingchikkungko maniara Gisikni biteko mesoka? (*See also Matt. 5:21, 22, 27, 28; 22:35–40.*)

Ge·eta Mingchikkungara ka·saani pal minggipin basee ra·ani ong·ja; uaragara an·chingara *ka·saako* maikai mesokna nanga una dilna dakchaka, mandenaba Isolnaba. Ka·saa niam baksa meligrikgija ong·ja. Isolna aro an·chingni noksulna ka·saara Ge·eta Mingchikkungko gamchatgija dakatja.

Be·enni ming 15 namgija kamrangko sulsul see janapaha gitan, Gisikni bitekoba uni ming 9 namgipa gunrangko sulsul see janapaha. Sastroni gimin skia·pora man·giparang indake bebera·aha je ia mingsku namgipa gunrangara chokgittam gngang, chokprako minggittam minggittam namgipa gunrangko donaha, aro chokpraknin meligrikani gngang. Mitamranga ian Isolgrimko mesoka ine ina, gipinranga ia chokgittam, chokprako minggittam minggittam ong·aniara an·chingni Isolna, an·chingni noksulna, aro bon·kame an·ching antangtang maikai ong·na nanga uko mesoka ine aganskaa; aro gipinranga ua sulsul segimin (*lists*)ranga Jisuni gimin talatanina nangchongmotgipa ong·a ine nikskaa. Sakantini mingantiko nikani gita aganarian mitam nama miksonganirang gngang, indiba mongsongbatsranggipa miksonganiko an·ching nikgualna nangja, aro uan Paulni, an·chingni Kristian janggi tangao pilakna bate gamchatbatsranggipara *ka·saako* donani ong·a.

Mingsku gunrangoni mingsagipa, ‘*ka·saa*’ko Paulni

skanggipa donaniara ong·gakaia ong·ja. Kristian janggi tanggipao ka·saanian mongsonggipa kamko ka·aniko ua Galati 5:6 aro 13 o mongsongbate aganaha, aro ua uko uni gunrangko gipino seanirangoba man·chapata (*2 Kor. 6:6, 1 Tim. 4:12, 6:11, aro 2 Tim. 2:22*). Pilak gipin gunrang Kristian ong·gijagiparangoni nabaengo, ka·saara Kristianoni dingtangmanchagipa ong·a. Bang·a gunrangni gisepo ka·saa Kristian guno nangchongmotgipa ong·na nanga; maina uan gipin gunrangonaba chabi gita ong·a. Ka·saara Gisikni biteo niksengbatgipa (*1 Kor. 13:13, Rom. 5:5*), aro Kristian sakprakni cholonko talatgipa ong·na nanga (*Johan 13:34, 35*), maibakai, basakoba basakoba uko mesokna nang·beani ong·omangba.

Ka·sao, an·tangko jeaniara baditana ong·a? An·tangko jea gri na·a sanaba ka·sana man·ama? Ka·saa aro an·tangko jeani gimin Jisuara an·chingna maiko skia?

Bristibar

September 14

CHEANIONA RAMA

Sakanti bebera·gipani ka·tongo be·en aro Gisik pangnan dakgrikbena nangoba, Kristian janggi tangenggipao amako, chu·sokgijaniko, aro papchi ganggopako man·na nangja.

Galati 5:16–26 o gita, be·enni kosako Gisikchi sason ka·ako man·e janggi tangna gita chol rama (*chabia*) ra maia?

Galati 5:16–26 o Gisikchi sason ka·ako man·gipani janggi tangani rokomko talatgipa mingbonga chabirang donga. Skanggipa, bebera·gipara Gisiko “re·rurana” nanga (*pod 16*). Greek katta *peripateo*, iani ortoara “re·ruraana ba ja·rikna” ine ong·a. Mingsinggipa Greek philosopher Aristotleko

ja-rikgiparangko Songregipa (*Peripatetic*) rang ine mingaha maina uamang Aristotleko, ua jechi re·a uchin ja-rikaha. Iano verbara present tenseo ong·a maina Paulara gisep gisep re·aiani gimin aganjaenga indiba salantion chotchanggija re·jringenganikosa miksonga. Iana agreba, iara Gisiko re·rurachina ge·etani gimin, Gisiko re·ruraania an·chingni salantio basee ra·na nanggipa ong·a ine mesoka. Gnigipa verbara “dilako man·na” ong·a (*pod 18*). Ian, an·chingara Gisik rongtalgipana, an·chingara bachi re·na nanga an·chingko dilna gita on·na nanganiko mesoka (*Rom. 8:14, ko 1 Kor. 12:2 baksa tosusabo*). Dilna an·chingni kam ong·ja; indiba ja-riknasa.

Minggipin minggni verbrang Galati 5:25 o nakata. Skanggipara “tangna” ong·a (Greeko *zao*). “Tanga”chi Paul atchitaiani *experienceni* gimin aganenga, uan sakanti bebara·gipaon chin dongna nanga. Paulni da·o ong·a (*present tense*) ko jakkalani atchitaiani *experienceko* mesokata, uko salantian gital dakattaitaina nanga. Maina an·chingara Gisikchisa tanga, uni gimin an·chingara Gisiko “re·rurana” nanga ine Paul seangkuaniko daka. “Re·a” ine pe·gipara pod 16 onimungde namen dingtangsranga. Iano ua kattara *stoicheo* ong·a. Ian military jakkalgipa katta ong·a jeni orto “line ka·e chadengata,” “ja·ku de·na tarie dona,” ba “niamko ja·rikna tarie donga” ine ong·a. Iano miksonganiara, Gisikara an·chingna janggikosan on·aia ong·ja indiba salantian an·chingni janggi tangnirangoba mesoktingipa ong·na nanga ine ong·a.

Pod 24 o Paulni jakkalgipara “chisolo datkapa” ingipa ong·a. Ian on·tisa kenani ong·a. An·ching Gisikko ja·rikode, an·chingara be·enni skarangko siatna mangrakgipa miksonganiko dakna nanga. Beben, Paulara toe aganania aganenga. An·chingara an·chingni janggina janggini cha·anirangko alachi aro be·enni skarangko okumu donanichi be·enko chisolo datkapa.

Kristoo nang-na ku-rachakgiminrangko amna gita, (je amna amanikon na-a da-o gele jokenga) mai dingtangani aro baseanirangko dakna nangenga?

Sukrobar

September 15

CHANCHIDAPANI: “Kristianni janggi tanganiara rinok rinok dakgipade ong-ja. Ua bilonggipa nanggrikanirangko chagrongna nanga. Bilonggipa dakmajoanirang uona sokbaa. ‘Maina be-enni ska Gisikni bobil, Gisikniba be-enni bobil ong-a.’ Ia a-gilsakni bon-kamgipa itihasona an-ching sepangbate re-baengon, bilongbatsranggipa ja-gao ke-atanirang an-chingona sokbagen. Uni chadrapani ka-namgija ong-batrorogen aro pilnipil re-bataitaigen. Jerangan bebe aro seng-aniko jegala uamangni ka-tongrang rakbatrorobagipa aro gisiko napatna man-gijani ong-batrorobagipa ong-gen, aro Isolna ka-sagipa aro Uni ge-etanirangko rakkigiparangni kosako uamangni ka-o nanga bilongbatsranggipa ong-gen. (MS 33, 1911).”—Ellen G. White Comments, *The SDA Bible Commentary*, vol. 6, p. 1111.

“Gisik Rongtalgipani gisik salna amaniara Kristoni janggi janggio ong-ani giminsa ong-a. An-ching Kristoko nikja aro Una ku-sik aganna man-ja; indiba Uni Rongtalgipa Gisik an-ching sepangon, biapsanon donga. Kristoko ra-chakgipa sakantion Ua kam ka-a. Jerangan Gisik Rongtalgipani dongkamaniko uia uamang Gisikni biterang—ka-saa, katchaa, tom-toma, chakchika, rinok rinok daka, nama, bebera-a, sontol daka, antangtango bamatarangko paraka (MS 41, 1897).”—Ellen G. White Comments, *The SDA Bible Commentary*, vol. 6, p. 1112.

CHANCHIGRIKNA SING-ANIRANG:

1. Be-enni skarangko chisolo datkapa ingipani bidingo chanchikamaniko dakkubo. Uni ortoara mai? Uko an-chingara maidake daka? Badita chang an-chinga uko

dakna nanga? Paulara maina indakgipa rakgipa kattako on-a? Uni jakkalgipa katta “chisolo datkapa” ingipara an-ching antangtango baditan rakgipa dakgrikani on-ga uani gimin an-chingna maiko agana?

2. Maidakgipa mandeni joton ka-ani kam Gisikni biteko nangatna ama? Na-a an-tangni ia kamni gimin maidakgipa experience ong-aniko aganna man-a?

3. Paulde, jemangan be-enni kamrangko ka-a uamang salgini songnokko man-rikjawa ine agana. An-chingara bebera-achisa jokatako man-a, an-chingni kamrangchide ong-ja ine Paul agana. Na-a ia agananiko maikai matchotatgen?

4. Na-a an-tangni Isol baksa re-ruraanio, nang-ni dal-batsranggipa dakgrikaniko chagronganira maia? Uan pap ong-jama, aro nang-ni Isol baksa nangrimaniko mai pap nosto ka-a? Sawa Kristian bobil ong-aniko, jajrenganiko, aro ka-beaniko papni a-sel uni janggi tangao man-kuja? Papko chena donsogimino pangchake, an-chingni jokataniara Jisu an-chingna maiko dakaha uosa chu-gimik pangchaka ine maina an-chingara pangnan gisik ra-na nanga?

JORA RIPENGKO SALGIO DAKA—BAK 2

Salgipino Marina mitam ki-taprangko Sahanana poraichina ra-baaha. Sahana ua ki-taprangko poraiahaon ua namen aiao inmanaha; maina Daniel aro Parape-arangara uno namen rongtalbeachim. Ja-mano Marina una *The Desire of Ages* koba ra-baaha. Gisik Rongtalgipaan una uan bebe ong-gen ine uiatako on-e Sahana uarangko ta-rakbee poraiaha.

Sahana Adventist mondolichi re-ange nina skaha aro uara uni chanchisoanirang gita dakama dakjama uko antangna nie ra-na skaha. Indake jensalo ua aro Marina Sonibaro (*mainaba*) chutiko man-ahaon, Marina uko giljaona rimbaaha. Uamang gilja nokona napahaon, Sahana Michaelko nikaha, jekon ua hospital gronghachim. Ua iako uina *surprise* ong-aha je uara ua chongipa gilja ka-gipa dolni dilgipa ong-achim.

Gilja jokani ja-mano, Sahana uni ripengna sriksrik aganaha, “Manderangara namen nambea aro melibea. Ia mondolian, nangni angna aganaha gita dakbebea. Da-osa, iano, gisikni tomtomaniko anga nikaha.”

Unsalogiljani ja-mano Sahana noktangchi re-pilangahaon, ua sikbee uni ma-a-paana uni *worship experienceni* gimin aganaha. Uni ma-a-paara pangnaba Seventh-day Adventistrangni gimin knakujachim, uni gimin Sahana uamangna adita bebera-ani ja-pangrangko aganaha aro uni poraimangimin ki-taprangni giminba aganaha. Ua Sastroko badale Ge-eta Mingchikkungni gimin poraie on-aha aro Isol mamung saloba Uni niamko gimaatkuja, ba Ua uko dingtangtkuja. “Jisu aro Uni sninggiparangba ia apsan niamrangkon maniaha,” ua uamangna agane on-aha.

Sahanani ma-a-paa uni kusi ong-aniko nike kusi ong-paaha. Uamang uko uni gitalgipa am-e nikaniko ja-rikchina didiaha,

indiba uamangde indita ru·uta bilsirangana bebera·atang giljaon re·ahanina unon re·angkugen.

Sahanani skiani bils matchotnasiahachim, aro ua minggipin kamko am·na somoi ong·engaha. Ua apsan somoio Sahanani ma·a-paarangba una segipako am·na a·bachengaha.

“Angni ma·a-paa sako basebagen uni gimin angade namen jajrengsoa,” Sahana sriksrik Marinana aganaha. “Na·a aro nangni segipade damsan apsan toromona re·baaha, indiba angni ma·a-paa angna, Sevenday Adventist toromko ra·ako namnikgijagipako rimbae on·manahaode? Anga sakoba angni bebera·ako sualrimna mangijagipako bia ka·na nangode, ian angni bebera·ako rakina neng·beani angna ong·gen.”

Aganangkugen
